

MAFUTAGA FAAFOUINA FAIFEAU MA A’OA’O TAUSI NUU

KOLISI FAA-FAIFEAU I MALUA – 31 AOKUSO, 2022

Saunia: Olive Samuelu (FS)

***Efika o Mataupu tau i le Ola o le Tagata ma le Fofoaga Faaauau: O le Atua ma Pāō o le Ola
Bio-ethics and Pro-Creativity: God and the Rhythm of Life***

Upu Tomua

E muamua lava ona faa-talofa atu i le paia maualuga o le Mafutaga Faafoouina, ua mafai ona aofaga potopoto i lenei taeao. Susu o lau Susuga i le Toeaina, o le Taitai foi o le Mafutaga o lenei aso, alalata’i foi le paia o le Au Toeaina, Tāmā o le Ekalesia faapea le Aufaigaluega tofofi, o Faafeagaiga taulagi a nuu ma afioaga. Susu foi le Susuga i le Alii Pule, Sui Pule ma le Kolisi i Malua. Malo le soifua maua, ma le lagi e mama.

Faatomuaga

E le toe na ma le laina le ogaoga o suiga tetele ua o tatou molimauina i lenei vaitau, ona o aafiaga o le faama’i o le Covid 19. Ua le gata ina satia ai ‘*pāō o le ola*’ sa o tatou masani ai, ae ua maumau ai foi le soifua o nisi. Peitai e le o muta ai le faaauauina pea o suesuega fa’a-fomai ma suesuega fa’a-saienisi, aua lava le tau togafitiga o isi foi faama’i ogaoga e ese mai le Covid, e pei o le kanesa, stroke, gasegase o le fatu, ma isi. Peitai e iai le faafitauli ua tulai mai, ua afaina ai suesuega faaauau nei faa-fomai ma sailiiliga faa-saienisi. O le aso 24 o Iuni, 2022, na soloia ai e le Faamasinoga Maualuga a le Malo tele o Amerika, le faaiuga na faia i le mataupu tau faamasinoga, *Roe vs Wade, 1973*.¹ O le iuga lea na faia i le 1973, sa faa-tulafonoina ai le faamutaina o se maitaga o se tina, pe afai o se maitaga e ono afaina ai le soifua maloloina, . Ae o le vala lea na saofaga ai le faaogaina e le au suesue, o le afuafu [embryo] ua mate, e tapena ai suesuega faa-saienisi, ua taua o le Embryonic Stem Cell Research [ESCR], aua ni togafitiga talafeagai mo le tele o gasegase.

O le soloia la o le *Roe vs Wade, 1973*, ua afua ai ona lagalagā finagalo o le toatele, e le gata i tagata kerisiano ma le au suesue, ae faapea foi i le itupa o tinā, o e o lo’o o latou tulimataia pea ma le toto’a lenei mataupu. O le aotelega o le faaiuga ua soloia ai le *Roe vs Wade, 1973*, sa faavae i luga o le talitonuga, ina ia toe faafoi le tulaga malu puipua o le saogalemu, ma le soifua maloloina lelei, o tinā ma tamaitai, o le *toala fanau*, o le *fofoaga faaauau* a le Silisiliese.

¹ Nina Totenberg, Sarah McCammon, ‘Supreme Court Overturns Roe v. Wade, 1973, Ending right to Abortion upheld for Decades,’ www.npr.org [Accessed 27/8/22].

Ae pei lava o aga masani o le soifuaga, e lua lava itu o so’o se finauga. O le aafia ai o mataupu silisili e fesootai ma *pāō o le ola*, aemaise le *foafoaga faaauau a le Atua*, o le ala lea o le talisapaia e le toatele o le au kerisiano, o le faaiuga ua aumai. Peitai, ua faaalua le tetee o nisi, aafia ai ma tagata kerisiano] ona e le gata ua oia ai faavae o le aia tatau a le tinā, [ma isi mafuaaga o le a faailoa atu i lalo] ae faapea foi le au atamamai i suesuega fa’a-fomai, aua o lea ua faamuta ona toe faaaogaina sela [stem cells] e toina mai le afuafu o le tina ua faamuta lona maitaga, i so’o se suesuega lava faa-fomai. [*embryonic stem cell research, ESCR*]

O lona uiga, e le itiiti le luitau ua taoto mai nei, aemaise lava mo i tatou le au faatuatua, ona e le na ma le laina, le aafia o i taua i gasegase tugā, mai lea taimi i lea taimi, *ae o lea ua ponatia suesuega mo togafitiga* sa faamoemoe iai. O le ala lea ua a’e ai se manatu, e tapena lenei pepa, a o se vaivaiga e ala i avanoa tatou te faasoa ai, ma soalaupule nisi o manatu faaalua, ma ua lagalaga ai lagona o le toatele, ona o le faaiuga ua soloia ai le mataupu, *Roe vs Wade, 1973*

Roe vs Wade, 1973: O Sina Talaaga Puupuu

O le tamaitai mai le Setete o Texas i Amerika e suafa ia **Norma McCorvey**, sa talosaga e faamuta lona maitaga lona tolu. Peitai, e le faatagaina se taotoga faapea i totonu o Texas, vagana o se taotoga e faasao ai le ola o le tina. O lea na faaulu ai loa lana tagi, [i lalo o le igoa fai, o **Jane Roe**], faasaga i le Loia Sili Faa-Itumalo a Dallas, Texas o **Henry Wade** i le tausaga e 1970. I le iuga na tuuina mai i le aso 22 o Ianuari 1973, na faamaonia ai e le Faamasinoga Maua luga le soli faavae o tulafono a le Setete o Texas, aemaise lava i le oia ai o aia tatau a le tinā.² Peitai o lea ua faaleaogaina nei le faaiuga lea,³ ma ua tapu ai nei ona toe faamuta se maitaga i soo se Setete lava o Amerika, [o loo tapena apili a nisi Setete] tusa lava pe afaina ai le soifua o le tinā.

Nisi o Mafuaaga e Lagolagoina ai le Tumau pea o le Mataupu, Roe vs Wade, 1973.

Sa matua talisapaia e le toatele le faaiuga, *Roe vs Wade*, i le 1973, aemaise lava i e o loo taulamua i suesuega faa-fomai, mo vailaau moomia i nisi o gasegase. O suesuega nei faa-fomai, [*ESCR*], o le sailiga lea o ni vailaau e togafiti ai nisi o gasegase e pei o le asthma, gasegase e aafia ai māmā o tagata matutua, kanesa, ma isi gasegase tugā e aafia ai le mama. O loo faaauau pea foi suesuega mo le Parkinson's disease, [gasegase o le faiai, e afua ai ona le paleni le gaoioi, ma gatete le tino i nisi taimi], Alzheimer's disease [gasegase o le faiai e mafua ai ona telegese le mafaufau o le tagata, ma faigata foi ona toe manatua se mea na tupu, ma ua le mafai ai ona faavasega e le mafaufau le gasologa e masani ona faatino ai feau ma galuega masani]; gasegase o le fatu, manuaga o le maea alio, stroke, aafiaga o le tino ua mu i se afi, ma'i suka, ma gasegase o ponaiivi ma le ma'i nunu

O leisi finauga e lagolago ai le faia pea o le *ESCR*, ona e faaono mafai e nei suesuega ona tapena ni sela fou i totonu o le tino o le tagata, e sui ai sela ua afaina poo ua mamate. A manuia

² Na toe saga faamausaliina atili lenei faaiuga, i leisi foi mataupu sa finauina, *Planned Parenthood of Southeastern Pennsylvania vs Casey, 1992*. I le silasila a le Faamasinoga lea i le 1992, e le solitulafono se taotoga, pe afai ua avea taumafaiga uma ina ia faamuta le maitaga, ma avega mamafa i le tina o loo ia tauaveina le meaalofo tagata [*undue burden on pregnant mother*].

³ *Dobbs vs Jackson Women’s Health Organization, 2022*.

taumafaiga ia, ona le toe moomia loa lea ona toe saili nisi e ofoina mai o latou totoga, e sui ai se totoga ua afaina o se ua gasegase [organ transplant]⁴ Talitonu foi nisi, afai o lea ua mafai ona tapena togafitiga mo gasegase, e pei o le dialysis, ventilators, open-heart surgery, ma le tele o isi togafitiga faa-fomai, lea ua mafai ona faasaoina ai le soifua ma le ola o le toatele, ua alagataua foi ona faaauau le ESCR, aua e mafai e le ESCR ona faaauau ‘*pāō o le ola,*’ e ui ina aafia se tagata i gasegase tugā.⁵

O leisi mataupu o loo finauina pea, o le fesiligā lea, poo anafea tonu na amata ai le tulaga ‘tagata’ [personhood] o le afuafu. Ua faamaonia i suesuega faa-saienisi, le le mautinoa tonu o le taimi, aso, minute, sekone, po’o le itula foi, na amata ai ona iloa/lagona uluai *pāō o le ola*, o le *foafoaga faaauau*. O lona uiga, ua agavaa foi la ona faatino suesuega ia, ESCR, ma avea ai le afuafu pei o seisi foi punavai o sailiiliga faa-omai mo togafitiga.⁶ O loo agai foi nisi o suesuega, pe mafai ona faamautu le taimi tonu na amata ai le ‘ola o loo i le faiai’ o le afuafu [*brain llife of fetus*]. A mautinoa le tulaga lea, o le a faigofie loa ona faia se faaiuga e taofia ai le faamutaina o se maitaga, aua o lea ua mafai ona *ta’u-tagata-ina* le *foafoaga faaauau* o loo afifi i totonu o le afuafu ola o le tinā, Peitai e lei maua foi se tali maoti o lea sailiiliga.⁷

Toatele tina ua o latou teena le faaiuga ua soloia ai le iuga, *Roe vs Wade, 1973*, ona o le aafiaga i le itu tau soifua maloloina, [maitaga i se tagata ua maua i le AIDS] faapea nisi o maitaga e lei mafauina [rape, incest]. Ua toe lagalaga ai foi ma le mataupu e uiga lava i le aia tataua a le tina [ft; fai e latou le faaiuga, po’o lona toalua, po’o ona matua, po’o lona aiga, po’o fomai?] I lona aotelega, e iai nisi o itu taua ma le aoga, e ao ai ona toe iloilo le iuga a le Faamasinoga ua tuuina mai, ona o le itu tau i le soifua maloloina, aemaise lava o sailiiliga ma suesuega faa-fomai mo togafitiga talafeagai.

Talisapaia le Soloia o le Faaiuga, *Roe vs Wade, 1973*.

Pei lava ona tomua le manatu autu o le vaiaso-Sa leni i le folafolaga a le Atua ia Isaako ma Repeka, e uiga i ‘tagata’ o le a fananau mai, o lea foi se agaga ma se taiala ua mafuli iai lagona o le toatele o le au kerisiano, e lagolago ai le soloia o le *Roe vs Wade, 1973*. O le taliaina e le toatele o le faaiuga, e peiseai ua matafi ese ai nisi o masaloga sa iai, e faatatau lava i suesuega, oloo faaoga iai afuafu ua mate o le tina. O le popolega o loo iai, afai o lea na mafai e suesuega

⁴ Jason T. Eberl, ‘The Beginning of Personhood: A Thomistic Biological Analysis,’ in *Bioethics*, April 1, 2000, Vol. 14, Issue 2 [ATLA Religion Database, 15/9/2010]. The potential medical advances that such research provides would be of enormous benefit. The use of harvested ES cells to grow new bodily tissues and organs for those who suffer from diseases requiring organ transplant.

⁵ Scott, B. Rae, and Paul, M. Cox, *Bioethics: A Christian Approach in a Pluralistic Age*. (Michigan: William B. Eerdmans Publishing Company, 1999,) 124.

⁶ Lisa Sowle. Cahill, ‘Bioethics’ in *Theological Studies*, March 1, 2006, Vol. 67, Issue 1 [ATLA Religion Database, 15/9/2010].

⁷ Shannon Moussa, Mario, A. Thomas., ‘The Search for the New Pineal Gland : Brain Life and Personhood,’ in *Hastings Centre Report*, May 1, 1992, Vol. 22, Issue 3 [ATLA Religion Database [15/9/2010]. The authors maintain that once the brain is "alive," so the "brain life" argument runs, then a person exists; and a person, at the age of seven weeks or seven years’ post-conception, has rights that must be respected

nei, [ESCR] ona fausia [*clone*] le mamoe lea na faaigoa ia Dolly, e tutusa lelei foliga ma leisi foi mamoe, o lona uiga, e le faigata foi ona ‘clone’ le tagata. Afai ae moni lea masaloga, e faaono fesiligia ai le ‘atoatoa’ [totality, sacredness] o le manava ola o le ‘*foafoaga faaauau*’ a le Silisiliese, sa masani ona tuulima atu e le tinā i le pepe fou ua fanau mai.⁸

O le talitonuga a le au kerisiano, o le afuafu o le tinā, o leisi foi tagata ola, e pei o tatou, aua o loo fausia i foliga o le Atua, pei ona talanoa iai le Kenese 1:26-27; 9: 5-6. O se vaega o le tino o le tinā ua ave iai le faamalumaluga a le mana o le Agaga o le Atua e toatasi, o le na ia faamaite uluai ‘*pāō o le ola,*’ mo lana ‘*foafoaga faaauau.*’ O le ala lea, e le tataui ai ona aafia i seisi lava finauga, le itu ‘tagata’ o le afuafu o le tina, lea e afua ai ona fa’atamaia mo le faamoemoe i ni suesuega. O le afuafu e le gata e paia, ae o leisi lea faamanatu taua, o le pule aoao a le Atua i le ola o le tagata, tusa lava pe le o mautinoa le aso, taimi, minute, sekone ma le itula, na tino mai ai.⁹

E ui ina fesiligia le itu ‘tagata’ o le afuafu, ae ua faamauiina foi i le tele o suesuega faa-saienisi e faapea, o le afuafu lea e afifi ai le tagata ola, e iai foi ona ‘*faalagona*’ [sentience], e mafai ona migoi, ma lagona foi le tiga, pei lava o se tagata ola.¹⁰ O lona uiga, o leisi lea ata manino o le auai pea o le mana o vavega, e ui ina le vaaia e mata, ma o le ala lea e le tataui ai ona toe aiaina e se tasi mea ua foafoaina e le Atua. O le faanoanoaga tele, e iai nisi o atunuu o Europa, ua o latou faatagaina faale-tulafono le faatau atu o afuafu o tina ina ia maua ai se seleni.¹¹ Peitai, o lea faiga faale-alofa, o loo maioio lelei lava ona tapu pei ona iai i Tulafono o le Feagaiga Tuai, e malu puipuia ai le ola o le tagata, ina ia aua lava nei afaina (Esoto 20:13; Teuteronomie 5:17; Kenese 9:5 -6).

Ua saga faamautuina atili foi le finauga lea a le au faatuatua, i lagona o le fai Salamo. [Silasila Salamo 51:5; 139:15]. Manatu le fai Salamo, o le ola o le tagata, e faaauau pea, e le fesiligia, mai lava i lona uluai afuafuaina seia avea ma tagata matua. O lona uiga, afai oloo tuufesili le au suesue, poo anafea na afuafua ai le tagata, o lea ua tali le fai Salamo, o le ‘ola’ poo le ‘meaalofa a le Atua’ o loo i totonu o le manava o le tina, o se *tagata*.¹² O lea foi se agaga o loo talanoaina i isi mau mai le Feagaiga Tuai, pei o le Salamo 51:5; Iopu 10:8-11, ma le Ieremia 1:5. O mau tusitusia o loo saga faamanino atili ai pea le tulaga o le ‘*faaauuina*’ o *pāō o le ola*, e le tataui ona motusia.

Sa mafuli lava le faatofalaiga a le au fai mataupu silisili, ina ua aliae mai le faaiuga a le Faamasinoga, ina ia toe lalaga, ma tulituliloa le talanoaina o le mataupu, ‘foliga vaaia o le Atua,’

⁸ Unknown Author, ‘Stem cell advance may not end Debate,’ *Christian Century* December 25, 2007, Vol. 124, Issue 26, [ATLA Religion Database (15/9/10)]. See also Rae and Cox, 110-112. Religious people take embryo cloning as equivalent of human beings taking a prerogative that belonged to God alone; ua fia Atua foi le tagata ia, ma fai e ia ana fuafuaga i mea e patino lava i le Atua

⁹ Rae and Cox, 131.

¹⁰ Tom, L. Beauchamp, James, F. Childress, *Principles of Bioethics*. Fifth Edition. (Oxford: Oxford University Press, 2001), 84

¹¹ Rae and Cox, 113.

¹² Rae and Cox, 121.

‘*image of God; Imago Dei* i le Gagana Latina.’ O le naunautaiga lava, ina ia manino pea le vaai a le tagata kerisiano, i le uiga loloto o foliga vaaia o le Atua, o loo atagia i le tagata fou, mai lava i lona uluai taimi na afuafua ai i le manava o lona tina, atoa ai ma lona faaauauina. O le talitonuga, a manino lelei le tagata faatuatua, i le faataotoga o fuafuaga alualu mamao ia a le Atua, i ona lava taimi, mo le *foafoaga faaaauau*, e le toe auga ona toe talanoa nisi, po’o anafea na amata ai. O le *foafoaga faaaauau* ua manava iai e le Atua le manava ola, e iai lona faamoemoe, e iai foi lona taunuuga, o le avea lea ma tagata matua. O le agaga lava lea e tasi, o le ‘faaauau’ [continuity], o loo atagia manino i le faaaogaina e Luka [1:41] o le upu i le Gagana Eleni, *brephos*, [baby, pepe]. O le naunau o Luka e faailo i le amataga o lana molimau le taua o le Atua na liutino tagata, [God incarnate] e ala i le ‘pepe’ ua fanau mai, i ona matua, o Iosefa ma Maria.¹³ O lona uiga, ua alagatatau ona aua nei toe fesiligia e nisi, le tulaga o le afuafua mai o le tagata i totonu o le manava o le tina, seia paia lona tagata matua, aua o lea na matamata le lalolagi i le pepe na fanau mai, na soifua faatasi ma ona lava tagata,, na maliu ma tanumia, ae na toetu manumalo mai le oti ma le tuugamau.

O leisi manatu e ao foi ona faamanino pea, o le afuafu o le tina, *o ia lava o lou tuaoi, ma lo’u tuaoi*. O lona uiga, e moomia ai lo tatou matuai faasaga e faia soo se gaoioiga ina ia malu puipuia ai *pāō o le ola*, pei foi ona malutia e le Atua le ola o e ua vaivai, ma e ua leai se malosia e tali atu ai, ae le o ni meatotino e tapena ai ni togafitiga o ni gasegase. O fanau iti, pei ona molimau le fai Salamo, [Salamo 127:3-5] o i latou lava o le tau mai le Atua, ma e lavea foi i totonu o le lio o e ua avea ma o tatou tuaoi.¹⁴

Saunoa Thomas Aquinas e uiga lava i le mataupu leni, e faapea, ‘*e tatau lava ona amanaia le va fesootai o le tino ma le agaga o le tagata, ma ia malamalama lelei foi i lo la sootaga, ona faatoa mafai lea ona maua se atoaga o ni mafaufauga e uiga i le tagata ola.*’¹⁵ A toe faaupu la le finagalo lea o Aquinas, o lona uiga, o le afuafu ola o le tina, o loo taoto ai *pāō o le ola*, o le tino atoa ma le agaga, o le tagata fou lea.

O Nisi o Faatupu Manatu ma le Finauga o loo Faia Nei

E iai le mau a le au rapi Iutaia e faapea, afai ua iai se tasi ua maua i se gasegase tigaina, ma ua le toe aoga iai se togafiti, e 2 lava mea e ao ona silasila totoa iai:

- i. aua nei faavavevaveina le gasologa o le uma malie atu o le ola o sea tagata,¹⁶ ma le

¹³ Rae and Cox, 136-137. O le upu, *brephos*, i le classical Greek, sa faasino lava i le afuafu o le tina, faapea foi ma le tamaititi [child]

¹⁴ Rae and Cox, 139.

¹⁵ Jason T. Eberl, ‘The Beginning of Personhood: A Thomistic Biological Analysis,’ in *Bioethics*, April 1, 2000, Vol. 14, Issue 2 [ATLA Religion Database, [15/9/2010]. Thomas Aquinas believed that one must consider both the body and the soul of a human being, understanding their interaction, in order to have a complete theory of human personhood

¹⁶ Rae and Cox, 39. One must not hasten the dying process

- ii. aua foi nei iai se taumafaiga, e toe faatelegese teisi ai le alu ese atu o le agaga o lea tagata ua latalata i ona toe taimi.¹⁷

O lagona ia o le Iutaia, e faavae i le talitonuga e faapea, o le tagata ua tigaina i se gasegase, ma ua tu lalata foi ona aso, e 3 lava aso o loo totoe, pe le atoa foi, ona oti loa lea. O lona uiga, o le faaaogaina o se togafitiga faa-fomai i se ua gasegase, o le taumafaiga lava lea e tuutiitia le tulaga o le agai atu i lona toe itula, ae le o le toe faalavelaveina o le aveesea o le ola, na foai mai e le Atua. O le tiute foi o le au tausii mai, poo se tausii soifua, latou te le faia lava soo se gaoioiga, poo soo se taumafaiga, e toe maua ai e le tagata ua tulalata ona aso, seisi malosii i tua atu.¹⁸

E faataua e le Iutaia le ola mai le Atua, ma le talitonuga, o le tagata ua maua i se mai, po'o se gasegase tugā foi, o aga masani lava ia o le ola, e maua ai foi e le tagata le avanoa e fesootai ai ma le Atua i se tulaga vavalalata – ona, o le Atua tausii mai pea, e na te lagonaina o tatou tiga ma mafatiaga uma. O le pule aoao lea a le Atua o lo'o atagia pea i le talitonuga lea o le au Iutaia.¹⁹ I se lagona vaivai, atonu o se manatu foi e mafai ona finauina ai le vaoia o le tele o suesuega o loo faaauuina pea, ma afaina ai *pāō o le ola*, ma le *foafoaga faaauau* a le Silisiliese.

E mafuli aoaoga a le Ekalesia Katoliko Roma, i le ave lea o le faamuamua, i le faatauaina o le afuafu, o se 'tagata atoa,' mai lava i le taimi na afuafua ai [e le taua poo anafea], seia oo ina avea ma tagata matua. E faapea foi ona lagolagoina e le tele o Ekalesia Poretasano i le lalolagi, ma le lotu Iutaia le mau lea a le Katoliko. Peitai ua lilifa Ekalesia nei i le faatalatalanoaina o le tulaga, o le alagatatau ona faamuta pea maitaga o tinā [lagolago i le *Roe vs Wade, 1973*], pe afai e iai ni mafuaaga tatau, faatasi ai ma ni aiaiga talafeagai [ft; ia maua le maliega o le tinā; ia malamalama le tinā i aafiaga o se taotoga, ma isi aia tatau faale-tulafono a le tagata ma'i].²⁰ O lona uiga, e fausia e le lotu Iutaia ma le Poretasano le alagatatau ona faaauau pea suesuega faa-saienisi, ESCR, pe afai o le taunuuga, o ni togafitiga talafeagai, e tele so latou avanoa e mafai ai ona faasaoina le soifua ma le ola o nisi ua afaina [*research may save lives*].

I le finauina lava o lenei mataupu, na saunoa ai se tasi o tamalii e suafa ia Charles W. Colson e faapea,

"A o tatou taumafai e faaleleia le tulaga o le soifua ma le olaga o aso fai so'o, e ao lava ona faatumauina pea le tulaga aloaia ma le mamalu o le tagata [human dignity]. E le tatau foi ona faoa e suesuega televavave faa-tekinokolisi i nei onapo le faamuamua e ao ona ave i le 'tagata.' A o tatou saili pea mo ni togafitiga e mafai ona maua, e ao foi ona o tatou saili i le mea sa'o ma le tonu e tatau ona fai, ma ia aua nei galo iai tatou, o so'o se taunuuga lelei lava e iu iai se sailiiliga, e le avea lena ma ala e tauamiotonuina [justify] ai se faatinoga ma se auala ua faia."²¹

¹⁷ Rae and Cox, 39. One must not slow down the departure of the soul from the body, when a person is in the dying condition.

¹⁸ Rae and Cox, 40.

¹⁹ Rae and Cox, 42-43.

²⁰ Rae and Cox, 142-143.

²¹ Charles W. Colson, 'Undaunted: Bioethics Challenges are Huge: But so is God,' in *Christianity Today*, August 5, 2002, Vol. 46, Issue 9 [ATLA Religion Database, (15/9/2010)]. Colson says, 'As we seek to improve human life,' he said, "we must always preserve human dignity. Advances in medical technology must never come at the expense of

Ae manatu le Faauluuluga o le Komiti Tofia a le Peresetene o Amerika, e gafa ma suesuega nei faatatau i Efika o Mataupu tau i le Ola o le Tagata, e faapea:

*‘E ui lava o loo faatino pea suesuega faa-saienisi, ma le loto ua mafatia, e tauleleia [justify] nei suesuega uma pe afai o le ala lea e maua ai le sini ma le faamoemoe autu o suesuega i mataupu e aafia ai le ola o le tagata.’*²²

Upu Faaiu

I lona aotelega, o loo tumau pea ona lagalaga finagalo o le toatele, talu ona tuuina mai le iuga, e soloia le *Roe vs Wae, 1973*, aemaise lava, o se mataupu e ogaoga ona aafiaga, ona e fitoitonu lava i mataupu e faatatau i le soifua ma le ola o le tagata. O le finauga a itu e lua, ua afua ona o lea sa mafai e le *Roe vs Wade, 1973* ona faamaite ni suesuega, mai se afuafu ua mate, mo se togafitiga, e faasaoina ai leisi ‘ola,’ po’o le tagata lea ua maua i se gasegase. [*a life lost in order to save another*] E le faigofie lava mo le tagata kerisiano ona fetuutuunai aoaoga a le Tusi Paia i mataupu e faatatau i ‘*pāō o le ola*’ faapea le ‘*foafoaga faaauau a le Atua*’ pe a fua i le saosaoa o suiga, ma tekinolosi ua faaoga i suesuega eseese i nei onapo.

O le lui ua taoto mai, pe lagolagoina le soloia o le *Roe vs Wade, 1973*, e pei ona iai nei, ma faamuta ai loa soo se taumafaiga lava e toe tapena nisi suesuega faa-fomai, ma mautinoa ai, o lo’o mausali ma malupuipuia lelei le ‘*foafoaga faaauau*’ a le Atua o loo tauaveina e tina,

PO’O LE:

Faaauau pea suesuega faa-saienisi, [toe apili le faaiuga a le Faamasinoga] ina ia mautinoa ai, o loo iai pea le *avanoa* e mafai ai e le au atamamai ona saili ni fofu mo le tele o faamai o loo tau ponatia ai ‘*pāō o le ola*’ o le fanau, le tāmā ma le tina, le tiakono ma le aoao fesoasoani, le Faifeau ma le Faletua, aiga, ma tagata o le Ekalesia’

O nai motugaafa ia, ao se vaivaiga foi a le auauna. Talitonu lava le manatu e le atoa matagi i liu o vaa, ae faamoemoe i le agaga o le Atua, ao se faatofalaiga foi i le paia o lenei Mafutaga, e faaatoa ai se taumafaiga. E ui lava i nei mau feeseeseaiga o taofi ma lagona ua folasia i lumamea, ae ou te fia aumaia lava le fuitau faamafanafana a o se upu faamalosiau a le toaina o Colson, e faaiu ai lenei pepa. O upu o le tautinoga a Colson e faapea:

Bio-ethics challenges are huge. But so is God.²³

Manuia le Mafutaga Faafouina o le 2022!

human conscience. As we seek what is possible, we must also seek what is right, and we must not forget that even the most noble ends do not justify any means.’

²² Quoted by Beauchamp and Childress, 84. The President’s Council on Bioethics, Human Cloning and Human Dignity [New York: Public Affairs, 2002], pp 153-158. *Although research is done with a “heavy heart,” the research is justified if necessary to achieve promising and consequential biomedical goals.* These were some of the voices heard from Members of President George W. Bush’s Council on Bioethics, who support human cloning-for-biomedical-research

²³ Charles W. Colson, ‘Undaunted: Bioethics Challenges are Huge: But so is God,’ in *Christianity Today*, August 5, 2002, Vol. 46, Issue 9 [ATLA Religion Database, (15/9/2010)].

Tusiga sa Fesoasoani i le Tuufaatasiga o lenei Taumafaiga

Beauchamp L. Tom. Childress F. James. *Principles of Bioethics*. Fifth Edition. Oxford: Oxford University Press. 2001.

Cahill. Sowle Lisa. 'Bioethics.' in *Theological Studies*. March 1 2006. Vol. 67. Issue 1. ATLA Religion Database. 15/9/2010.

Colson. W Charles, 'Undaunted: Bioethics Challenges are Huge: But so is God.' in *Christianity Today*. August 5, 2002. Vol. 46. Issue 9. ATLA Religion Database. 15/9/2010.

Eberl. T Jason, 'The Beginning of Personhood: A Thomistic Biological Analysis.' in *Bioethics*. April 1, 2000. Vol. 14. Issue 2. ATLA Religion Database. 15/9/2010.

Mario. Moussa Shannon. Thomas A. 'The Search for the New Pineal Gland: Brain Life and Personhood.' in *Hastings Centre Report*. May 1, 1992. Vol. 22. Issue 3. ATLA Religion Database. 15/9/2010.

Rae B. Scott., and Cox M. Paul. *Bioethics: A Christian Approach in a Pluralistic Age*. Michigan: William B. Eerdmans Publishing Company. 1999.

Totenberg, Nina. McCammon. 'Supreme Court Overturns Roe vs. Wade, 1973. Ending right to Abortion upheld for Decades.' www.npr.org. Accessed 27/8/22.

Unknown Author, 'Stem cell advance may not end Debate.' in *Christian Century*. December 25, 2007. Vol. 124. Issue 26. ATLA Religion Database. 15/9/10.